

自稱帝一方淳曰寡君以乃祖世濟忠良未能雪天下之耻解衆人之  
倒懸百且忘食枕戈待旦以琅邪中興江東故萬里翼戴將成桓文之  
事何言自取邪雄有慙色曰我乃祖乃父亦是晉臣往与六郡避難此  
地爲同盟所推遂有今日琅邪若能中興大晉於中夏示當率衆輔之  
淳還通表京師天子嘉之時李驤死以其子壽爲大將軍西夷校尉督  
征南費黑征東任昞攻陷巴東太守楊謙退保建平壽別遣費黑寇  
建平晉巴東監軍母丘奧退保宜都雄遣李壽攻朱提以費黑叩攀以  
爲前鋒又遣鎮南任回征木落分寧州之援寧州刺史尹奉降遂有南  
中之地雄於是赦其境內使班討平寧州夷以班爲撫軍咸和八年雄  
生瘍於頭六日死時年六十一在位三十年僞謚武帝廟曰太宗墓號  
安都陵雄性寬厚簡刑約法甚有名稱氏符成文隗旣降復叛手傷雄  
母及其來也咸釋其罪厚加待納由是夷夏安之威震西土時海內大  
亂而蜀獨無事故歸之者相尋雄乃興學校置史官聽覽之暇手不  
釋卷其賦男子歲穀三斛女子半之戶調絹不過數丈綿數兩事少役